

巢氏病源



重刊巢氏諸病源候總論卷三十

唇口病諸候

凡十七論

口舌瘡候

手少陰心之經也心氣通於舌足太陰脾之經也脾氣通於口
府藏熱盛熱乘心脾氣衝於口與舌故令口舌生瘡也診其脈
浮則爲陽陽數者口生瘡其湯熨針石別有正方補養宣導今
附於後

養生方導引法云凡人覺脊背嚬強不問時節縮咽嚬內仰面
努髀井向上頭左右兩向按之左右三七一住待血氣行動定

然始更用初緩後急不得先急後緩若無病人常欲得旦起午時日沒三辰如用辰別二七除寒熱病脊腰脛項痛風痺口內生瘡牙齒風頭眩終盡除也

緊脣候

脾與胃合胃爲足陽明其經脈起鼻環於脣其支脈入絡於脾胃脾胃有熱氣發於脣則脣生瘡而重被風邪寒濕之氣搏於瘡則微腫濕爛或冷或熱乍瘥乍發積月累年謂之緊脣亦名審脣

脣瘡候

脾與胃合足陽明之經胃之脈也其經起於鼻環於脣其支脈入絡於脾脾胃有熱氣發於脣則脣生瘡

脣生核候

足陽明爲胃之經其支脈環於脣入絡於脾然脾胃爲表裏有風熱邪氣乘之而衝發於脣與血氣相搏則腫結外遇風冷乘其結腫不消則成核

口吻瘡候

足太陰爲脾之經其氣通於口足陽明爲胃之經手陽明爲大腸之經此二經脈並夾於口其府藏虛爲風邪濕熱所乘氣發

於脈與津液相搏則生瘡恆濕爛有汗世謂之肥瘡亦名鷺口

唇口面皴候

唇口面皴者寒時觸冒風冷冷折腠理傷其皮膚故令皴劈經絡之氣諸陽之會皆在於面其脈有環唇夾於口者若血氣實者雖勁風嚴寒不能傷之虛則腠理開而受邪故得風冷而皴劈也又冬時以暖湯洗面及向火外假熱氣動於腠理而觸風冷亦令病皴

兔缺候

人有生而唇缺似兔唇故謂之兔缺世云由婦人妊娠時見兔

及食兔肉使然

口臭候

口臭由五藏六府不調氣上膈然府藏氣燥腐不同蘊積胃
鬲之間而生於熱衝發於口故令臭也

養生方云空腹不用見臭尸氣入脾舌上白黃起口常臭也

口舌乾焦候

手少陰心之經也其氣通於舌足太陰脾之經也其氣通於口
府藏虛熱氣乘心脾津液竭燥故令口舌乾焦也診其右手寸
口名曰口氣以前脈沈爲陰手太陰肺之經也其脈虛者病苦

少氣不足以息嗑乾無津液故也又右手關上脈浮爲陽足陽
明胃之經也其脈虛者病苦脣口乾又左手關上脈浮爲陽足
少陽膽之經其脈實者病苦腹中滿飲不下咽乾

舌腫強候

手少陰爲心之經其氣通於舌足太陰脾之經其氣通於口太
陰之脈起於足大指入連舌本心脾虛爲風熱所乘邪隨脈至
舌熱氣畱心血氣壅澀故舌腫舌腫脈脹急則舌腫強

謇吃候

人之五藏六府稟四時五行之氣陰陽相扶剛柔相生若陰陽

和平血氣調適則言語無滯吐納應機若陰陽之氣不和府藏之氣不足而生謇吃此則稟性有闕非針藥所療治也若府藏虛損經絡受邪亦令語言謇吃所以然者心氣通於舌脾氣通於口脾脈連舌本邪乘其藏而搏於氣發言氣動邪隨氣而干之邪氣與正氣相交搏於口舌之間脈則否澀氣則壅滯亦令言謇吃此則可治

養生方云憤滿傷神神通於舌損心則謇吃

重舌候

舌心之候也脾之脈起於足大指入連於舌本心脾有熱熱氣

隨脈衝於舌本血脈脹起變生如舌之狀在於舌本之下謂之重舌

懸癰候

懸癰爲音聲之關也喉嚨氣之所上下五藏六府有伏舌上衝於咽喉熱氣乘於懸癰或長或腫

咽喉垂倒候

喉嚨者氣之所上下也五藏六府呼吸之道府藏者有風邪熱氣上衝咽喉則腫垂故謂之垂倒

失欠頷車蹉候

腎主欠陰陽之氣相引則欠諸陽之筋脈有循領車者欠則動於筋脈筋脈挾有風邪邪因欠發其急疾故令失欠領車蹉也

數欠候

腎主欠而腎爲陰也陽氣主上陰氣主下其陰積於下者行陽未盡陽引而上陰引而下陰陽相引二氣交爭而挾有風者欠則風動風動與氣相擊故欠數

失枕候

失枕頭項有風在於筋脈間因臥而氣血虛者值風發動故失枕

咽喉心胃病諸候

凡十一論

喉痺候

喉痺者喉裏腫塞痺痛水漿不得入也人陰陽之氣出於肺循喉嚨而上下也風毒客於喉間氣結蘊積而之熱吹喉肺塞而痺痛脈沈者爲陰浮者爲陽若右手關上脈陰陽俱實者是喉痺之候也亦令人壯熱而惡寒七八日不治則死其湯熨針石別有正方補養宣導今附於後

養生方導引法云兩手拓兩頰手不動摟肘使急腰內亦然住定放兩肘頭向外肘髀腰氣散盡勢大悶始起來去七通去喉



痺

又云一手長舒合掌仰一足捉頰挽之向外一時極勢二七左右亦然手不動兩向側勢急挽之二七去頸骨急強頭風腦旋喉痺髀內冷注偏風

馬喉痺候

馬喉痺者謂熱毒之氣結於喉間腫連頰而微壯熱煩滿而數吐氣呼之爲馬喉痺

喉中生穀賊不通候

穀賊者禾裏有短穗而強澀者是也誤作米而人食之則令喉

裏腫結不通令風熱氣在於咽間與血氣相搏則生疼痛如食穀賊者也故謂之喉中生穀賊不急治亦能殺人

狗咽候

喉內忽有氣結塞不通世謂之狗咽此有風熱所作與喉痺之狀相似但俗云誤吞狗毛所作

又云治此病者以一搏飯共狗分食便瘥所以謂之狗咽

咽喉瘡候

咽喉者脾胃之候也由脾胃熱其氣上衝咽喉所以生瘡其瘡或白頭或赤根皆由挾熱所致

尸咽候

尸咽者謂腹內尸蟲上食人喉咽生瘡其狀或痒或痛如甘蠶之候

喉咽腫痛候

喉咽者脾胃之候氣所上下脾胃有熱熱氣上衝則喉咽腫痛夫生腫痛者皆挾熱則爲之若風毒結於喉間其熱盛則腫塞不通而水漿不食便能殺人藏氣微熱其氣衝喉亦能腫痛但不過重也

喉癰候



六府不和血氣不調風邪客於喉間爲寒所折氣壅而不散故結而成癰凡結腫一寸爲癰二寸至五寸爲癰

咽喉不利候

府藏冷熱不調氣上下哽澀結搏於喉間吞吐不利或塞或痛故言喉咽不利

心痺候

思慮煩多則損心心虛故邪乘之邪積而不去則時害飲食心裏幅幅如滿蘊蘊而痛是謂之心痺診其脈沈而弦者心痺之候也

胃痺候

寒氣客於五藏六府因虛而發上衝胃間則胃痺胃痺之候胃中悞悞如滿噎塞不利習習如痒喉裏澀唾燥甚者心裏強否急痛肌肉苦痺絞急如刺不得俛仰胃前肉皆痛手不能犯胃滿短氣欬唾引痛煩悶白汗出或徹背脊其脈浮而微者是也不治數日殺人其湯熨針石別有正方補養宣導今附於後養生方云以右足踐左足上除胃痺食熱嘔而不甲飢

四肢病諸候

凡十四論

代指候

代指者其指先腫焮焮熱痛其色不黯然後方緣爪甲邊結膿
極者爪甲脫也亦名代甲亦名糟指亦名土寧一作竈夫爪甲筋
之餘也由筋骨熱盛氣澀不通故腫結生膿而爪甲脫

手足逆臚候

手足爪甲際皮剝起謂之逆臚風邪入於腠理血氣不和故也

手足發胝候

人手足忽然皮厚澀而圓短如繭者謂之胼胝此由血氣沈行
不榮其表故皮澀厚而成胝

肉裂候

